

四庫全書

史部

# 欽定四庫全書

史部  
詞林典故卷四

詳校官編修<sub>臣</sub>曹振鏞

編修<sub>臣</sub>程嘉謨覆勘

總校官編修<sub>臣</sub>王燕緒

校對官待詔<sub>臣</sub>胡士震

謄錄監生<sub>臣</sub>宋允奎

欽定四庫全書

詞林典故卷四

恩遇

人臣躬膺眷遇垂之簡冊於以見惠下之恩焉於  
以見禮賢之盛焉於以見逢時之幸焉非徒矜耀  
寵光流艷筆札而已我

朝

列聖加恩詞苑諸臣

金史卷一百一十二  
卷四  
異數殊榮超軼往古

國史所錄私集所傳不可勝紀掇其尤著者彙叙於篇  
至前代東壁西清類多優遇第其間或跡涉乎燕  
私誼弛於莊敬不能髣髴我

朝之恭儉慈惠足以垂訓方來者則闕而不書懼褻  
也又翰林昉自開元其禮遇所加必自設有專官  
斯徵故實故是篇採擷舊聞斷自唐始

唐

唐武德四年開館以延文學之士杜如晦房玄齡虞  
世南褚亮姚思廉李通元蔡允恭薛元敬顏相時  
蘇勗于志寧蘇世長薛收李守素陸德明孔穎達  
蓋文達許敬宗等十八人並以本官兼文學館學  
士分番直宿恩禮優厚士大夫得與其選者時人  
謂之登瀛洲

通鑑

按武德乃唐高祖紀元其文學館學士則太宗為  
秦王時府中所署也李肇翰林志首載其事常執

誼翰林故事云貞觀中秘書監虞世南等十八人或秦府故僚或當時才彥並以弘文館學士會於禁中內參謀議出侍乘轡入陪燕私當時號為十八學士所記與史文微異

唐景龍二年始於修文館置大學士四員學士八員直學士十二員於是李嶠宗楚客趙彥昭韋嗣立為大學士李適劉憲崔湜鄭愔盧藏用李乂岑羲劉子元為學士薛稷馬懷素宋之問武平一杜審

言沈佺期間朝隱等為直學士其後被選者不一  
凡饗會游豫惟宰相直學士得從春幸梨園並渭  
水祓除則賜柳園辟癘夏宴葡萄園賜朱櫻秋登  
慈恩浮圖獻菊花酒稱壽冬幸新豐歷白鹿觀登  
驪山賜浴湯池給香粉蘭澤從行給翔麟馬品官  
黃衣各一帝賦詩學士皆屬和當時人所欽慕

全

唐詩話

唐孔帖張說進中書令詔說與禮官學士置酒集仙

殿曰朕今與賢者樂於此當遂為集賢殿乃下制  
改麗正書院為集賢殿書院而授說學士知院事

淵鑑類函

唐明皇於勤政樓以七寶裝成山座高七尺召諸學  
士講論古今勝者升座張九齡論辨風生首登此

座翰林志

唐姚崇為學士明皇思崇欲與論時務令侍御者步  
輦召來時人榮之

唐書



唐李白召見金鑾殿草和蕃書思若懸河帝以七寶

牀賜食御手調羹以飲之

翰林志

按唐范傳正作李白碑云天寶初召見金鑾殿玄宗嘉之褐衣恩遇前古無比遂直翰林專掌密命而李肇韋執誼並云玄宗建翰林院韓紘閻伯璵陳兼李白等皆在焉雖假其名並不職事陸贄亦云玄宗建翰林止於倡和文章批答表疏其於樞密輒不預知四人與天寶相去未遠然已不同如

欽定四庫全書

詞林典故  
卷四

此碑文又云上泛白蓮池召白作序時已被酒翰林院中乃命高力士掖以登舟而開寶遺記則云玄宗在沉香亭觀牡丹盛放召白使作樂府白方醉甚乃令高力士扶掖升殿上自以水洗其面使醒於是作清平調辭亦與碑文互異

又按後世多稱李白為翰林學士似有專官然碑文止曰直翰林即宋時刻白詩文皆曰李供奉集唐玄宗置麴清潭砌以銀甃泥以石粉貯三辰酒一

萬車以賜當制學士等

雲仙雜記

唐陸贄始入翰林年尚少天子常以輩行呼而不名  
在奉天朝夕進見然小心精密未嘗有過由是帝  
親倚至解衣衣之雖外有宰相主大議而贄常居  
中參裁可否時號內相

唐書

按陸贄集序云贄扈從行在啓沃謀猷上特所親  
信有時燕語不以公卿指名但呼陸九而已又從  
官相失上夜召不至令於禁旅曰得陸贄者賞千

金頃之乃至太子諸王皆賀

唐韋處厚知制誥召入翰林院別充侍講學士嘗侍  
遊蓬萊池延問六經大義退而進法言十二篇上  
優詔答之賜以金紫內署故事與外庭不同凡言  
學士必草詔書有侍講者專備顧問至是上思有  
以寵之乃使內謁者申命去侍講之稱劉禹錫序  
唐韋綬在翰林德宗嘗幸其院綬方寢學士鄭絪欲  
馳告之上不許時適天寒以從妃蜀纈袍覆之而

去 唐書

唐德宗幸金鑾院問學士鄭餘慶曰近日有衣作否

餘慶對曰無之乃賜百縑令作寒服 唐國史補

唐元和時館閣湯飲待學士者煎麒麟草 雲仙雜記

唐學士初上賜食皆蓬池魚膾夏至須冰及酒以酒

味濃和冰而飲禁中有郢酒坊 會要

唐文宗賜翰林學士章服續有待詔亦欲賜者奉司

以名上上曰賜君子小人不同日且待別日 因話錄

唐令狐綯為翰林承旨夜對禁中燭盡帝以乘輿金蓮華炬送還院吏望見以為天子來及綯至皆驚

唐書

宋

宋太平興國八年召閣下舍人李穆宋白賈黃中呂蒙正李至入院時承旨扈蒙贈詩賀之有五鳳齊飛入禁林之句其或觀稼於南薰門賞花於含芳園春盡嚴蹕百司景從幸國西之金明池下雕輦

登龍舟都人駕肩百樂具舉憩瓊林苑由複道御  
層樓臨軒置酒以閱繁盛兩制必侍從焉至上林  
春融千花萬卉妍麗冠絕上必曲宴宰衡勳舊召  
兩制詞臣俯龍池垂金鈎舉觴賦詩終日而罷太  
宗嘗謂宰執近臣曰詞臣實神仙之職也翊日凡  
所進詩悉迴御毫屬和以賜焉

續翰林志

宋太宗嘗諭蘇易簡曰詞臣清美朕恨不得為之夜  
幸本院易簡已寢內侍以燭自窻照之俾具衣冠

紗窓燃破後不復補以示優禮

同上

宋蘇易簡撰翰林志成以獻太宗太宗大悅特賜詩二篇皆獎飾褒美之旨其後御筆批云詩意者因卿進續翰林志美居清華之地也

次續翰林志

宋太宗於紅羅上御書飛白四字曰玉堂之署特以賜蘇易簡易簡捧歸私第耀其親易簡之母具命服焚香拜而觀之喜歎之聲動於鄰里即命置本院中擇日懸挂乃具扁鑲於玉堂之上待詔院吏



而下咸列賀於庭易簡曰自唐置學士已來幾三

百年今日方知貴矣

同上

宋太宗御便殿案上有御書飛白一紙蘇易簡請賜  
焉上雖許而未即予適呂蒙正奏事入見之又以  
為請太宗曰已許蘇某矣遽命易簡取之左右無

不健羨

同上

宋蘇易簡嘗奏事歸院太宗即時宣召顧左右曰宣  
蘇某來及對敝而退上猶未起又曰召當直學士

來及再對畢出未到廳上又曰召承旨來蓋政事多所咨訪故一日三接見而三易其稱特眷注之

深厚耳

同上

宋太宗以蘇易簡久在內署費用不足特為定草麻例物每除官者朝謝日命閣門督之自是無敢闕者易簡好飲酒上嘗作戒酒勸酒詩二章草書以

賜同上

宋學士楊億初為光祿丞太宗愛其材一日後苑賞

花宴詞臣億不得預乃作詩以貽諸館閣諸公不敢匿即以進呈上詰有司所以不召之故左右對以未帖職即命直學士院免謝令預晚宴其眷遇如此

澠水燕談錄

宋楊億為翰林學士以久疾初愈入直乞權免十日起居詔免半月仍令出宿私第億具表謝真宗以詩批其末眷禮之盛古未有也

石林燕語

按却埽編云億初入館時年甚少故事初授館職

必以啟謝先達億啟事有曰朝無絳灌不妨賈誼之少年坐有鄒枚未害相如之末至一時稱之

宋晁迥在翰林以文章德行為真宗所優異因草詔命坐賜茶既夕上顧左右取燭與學士中使執以前導出內門嘗侍宴禁中賞花故事惟親王宰相則使中使為插花餘皆自簪之上獨令內侍為迥戴花觀者榮之

太平盛事

宋真宗一日晚坐承明殿召學士對既退中人就院

宣諭曰朕適忘御袍帶卿無訝焉學士將降謝中

人止之云有旨放謝真宗禮遇詞臣厚矣

溫水燕談錄

宋陳彭年在翰林所兼十餘職皆文翰清秘之目時

人謂其署銜為一條冰

冊府元龜

宋錢惟演在翰苑時中秋有月上問當直學士是誰

左右以姓名對命小殿對設二位召來賜酒惟演

至殿側侍班俄頃女童小樂引步輦至宣學士就

坐惟演奏故事無君臣對坐之禮上云天下無事

月色清美與其醉聲色何如與學士論文若要正  
席則外庭賜宴正欲畧去苛禮放懷飲酒固辭不  
已再拜就坐上引謝莊賦李白詩美其才又出御  
製詩示惟演惟演仰歎聖學高妙每起謝必勅內  
侍扶掖不令下拜夜漏下三鼓上悅甚令左右宮  
嬪各取領巾袞帶或團扇手帕求詩應之略不停  
輟上云豈可虛辱須與學士潤筆遂各取頭上珠  
花一朶裝於幞頭簪不盡者置服袖中宴罷上命

撤金蓮燭令內侍扶掖歸院翌日問學士夜來醉

否奏云雖有酒不醉都下盛傳天子請客

錢氏私誌

宋呂溱以侍讀學士知徐州賜宴資善堂遣使諭曰  
此特為卿設宜盡醉也詔自今由經筵出者視為

例宋史

宋曾公亮為天章閣待制賜金紫先是待制不改服  
仁宗面錫之曰朕自講席賜卿所以尊寵儒臣也

遂知制誥同上

宋學士王珪召對蕊珠殿設紫花墩命坐珪詩曾陪

蕊珠殿獨賜紫花墩紀其事

翰林記

宋張方平在翰林仁宗嘗手詔褒之曰卿文章典雅

有三代風

言行錄

宋仁宗擢司馬光為學士光上疏力辭上手以誥敕

授光

司馬家傳

宋蘇軾在翰苑薄暮中使宣召入對內東門宣仁后

曰學士前年為何官曰臣前年為汝州團練副使



今為何官曰臣今待罪翰林學士曰何以遽至此  
曰遭遇太皇太后陛下曰不關老身事曰遭遇皇  
帝陛下曰亦不關官家事曰豈出大臣論薦曰亦  
不關大臣事軾驚曰臣雖無狀不敢自他途以進  
宣仁后曰久欲令學士知此是神宗皇帝之意帝  
飲食停匕箸看文字宮人私相語必蘇軾之作帝  
每曰奇才奇才但未及進用耳已而命坐賜茶撤

御前金蓮燭送歸院

聞見後錄

宋舊制學士凡召入院止賜銀鞍勒馬暨後優待特異賜金鍍銀鬧裝鞍馬對衣荔枝金帶郊裡禮畢賜對衣金帶或牯犀帶金魚副之十月朔舊賜對衣紅錦袍上特以細花熟錦袍代之自是遠方之珍果天府之法釀龍鳳之茗芽伏臘之餅餌以時而賜悉加等焉

續翰林志

宋紹興十四年九月車駕幸祕書省至道山堂御幄降輦後進食畢催班右文殿下報引羣臣使相樞

密侍從正任以上提舉祕書省官以下各宣名奏  
萬福訖候御樂降階行禮畢上起詣祕閣宣羣臣  
觀累朝御書御製書畫古器等祕書少監以下閣  
下侍立俟觀書訖先退赴右文殿立班定上起歸  
幄更衣臣僚從駕還內如來儀賞賚羣臣有差又  
詔祕書省實錄院官各轉一官祕書少監仍賜緋  
章服并御書扇

館閣錄

按淳熙五年九月幸祕書省一如紹興中故事

宋侍讀史浩宴澄碧殿抵暮送以金蓮燭宿玉堂  
直廬命作詩敘此會浩進古詩上御製俯同其韻

玉堂雜記

元

元天歷二年春肇開奎章閣延登儒流入侍燕閒萬  
幾之暇親灑宸翰書奎章閣記刻置禁中凡墨本  
悉識以天歷之寶或加用奎章閣寶應賜者必閣  
學士持詣榻前四復奏然後予之

黃文獻集

明

明太祖吳元年詔學士朱升年老特賜免朝謁

翰林記

明洪武初編修羅復仁者上喜其誠樸車駕一日幸

其私第復仁方操塗具完壁不虞上之至也呼妻

以橈坐上上與語良久歎息而去即命工部賜第

城南門外尋以為弘文館學士及乞致仕從之賜

以大布之衣謂曰表爾樸也

同上

明洪武初編修張藻仲歸娶詔賜驛舟寶鈔

同上

明洪武七年皇太子臨大本堂召東宮諸讀及諸王府讚讀等二十五人諭之曰爾等離父母去墳墓者三年矣今冬氣向深草木搖落寧不惻然動懷土之情乎吾已為請於上宜各旋歸歸即遄至毋久淹為也因出內府錢分賜以為道塗費

同上

明初宋濂為起居注臥病京師官舍六日不入侍上顧問近臣曰老宋起居何久不見或言其有疾上憂形於色曰宋起居純飭之士侍我十五年猶一

日不知何以有斯疾越三日問病勢損否或對如  
初上曰爾往傳命俾歸養金華山中父子祖孫歡  
然同聚疾必易愈愈則速造朝國家文翰庶幾有  
賴乃出太府金以賜候問之使相屬於道時方嚴  
肩輿之禁雖相國亦不之許特命造安車給十六  
人以載尤異數也 同上

明洪武六年學士宋濂詹同侍上宴於便閣同被酒  
而還時監生黃昇在院中同愛其有俊才賦詩贈

之少頃復召同與漁至右順門上謂同曰卿醉猶未醒耶同對曰臣雖醉尚能作詩贈黃秀才謂景也上命取來觀之笑謂漁曰朕和同詩卿為朕書之漁歸與同列言之以為詞壇盛事

同上

明洪武七年以學士宋漁老而艱於行詔太子選良馬以賜上親作馬歌令羣臣賡和示寵澤焉

同上

明宋漁侍宴上親賦楚辭一章以賜仍命侍臣賦醉

學士歌

通紀會纂



明洪武九年六月上謂學士承旨宋濂曰朕以布衣  
為天子卿亦起草萊列侍從為開國文臣之首俾  
世世與國同休戚不亦美乎趣令取子孫官之屢  
辭謝不敢有詔不允遂徵濂冢子璿之子慎為殿  
廷禮儀司序班未幾復召濂子璿為中書舍人上  
時休暇輒命題試璿與慎而戒勅之笑謂濂曰朕  
為卿教子孫濂或奏事久稱倦上命璿慎共扶下

殿翰林記

明洪武九年十一月學士承旨宋濂致仕詔特贈其父原贈禮部侍郎文招為嘉議大夫禮部尚書祖德政為亞中大夫太常寺少卿誥辭皆上親製稱濂有曰德量之宏如千頃波澄之不清撓之不濁天下榮之同上

明學士承旨宋濂致仕將行上曰卿去何時復來見朕幸相待數日姑徐徐行遂賜金幣文綺問卿年幾何對曰六十有八上曰藏此綺三十二年後作

百歲衣也。漁請歲一來朝。明年入朝。見於端門上。  
大喜。加勞。再三特勅。賜醪膳諸物於寓。比歸。復遣  
中使。賜上尊。至於道。所經行。上親為之指畫。既行。  
數日上問其子璉。汝父道中安否。曰。安。未幾。復謂  
璉曰。朕疇昔之夜。夢見汝父。笑談如曩時。汝父雖  
去。其容儀儼然在朕目中。也。同上

明洪武十四年。賜本院官羅衣各一襲。同上

明洪武十六年正月。以右贊善董倫為左春坊大學

士賜文綺六疋鈔五十錠十七年三月賜學士宋

訥文綺帛各二疋鈔十錠

同上

明永樂初萬壽聖節學士侍宴奉天殿近侍及修史

官宴中左門正旦元宵端午重陽冬至臘日等節

往往宴於禁庭皇后皇太子千秋節亦如之若御

三殿筵宴於內閣學士尤隆至或有撤御筵玉食

以遺其父母者

同上

明沈度弟縉皆善書永樂初詔部簡能書者入翰林

度與選名出朝士右凡金版玉冊用之朝廷藏祕  
府頒屬國必命之書遂由翰林典籍擢檢討歷修  
撰遷侍讀學士祭自翰林待詔遷中書舍人擢侍  
讀進階大理少卿兄弟並賜織金衣鏤姓名於象  
簡泥之以金時號度祭大小學士

明史

明永樂三年命學士解縉等選新進士才識英敏者  
就文淵閣進學於是選修撰曾榮等凡二十八人  
以應二十八宿時庶吉士周忱自陳年少願進學

上喜曰此有志之士也命增忱為二十九人歌

其榮通紀會纂

明永樂十三年七月學士楊士奇等侍文華殿上出

趙孟頫所書滕王閣序賜之翰林記

明永樂十八年四月上在西內圓殿召學士楊榮金

幼孜至殿外命坐賜食其羹糜蓋出於御前調和

珍異非常且復有上尊熟食酪漿櫻桃之賜所賜

上尊封識皆有墨印洞庭春色四字同上

明永樂二十年金幼孜與侍讀王英扈從北征英嘗  
奏事上喜曰秀才是二十八人讀書者朕需爾為  
用正好宣力又諭太監孟驥曰秀才有事即令入  
見毋阻二十一年楊榮扈從西征一應軍務悉命  
榮掌之日夕或三接或五接每以楊學士稱之而  
不名

同上

明永樂中上召學士楊士奇等七人謂之曰朕即位  
以來爾等朝夕在左右敬慎勿怠宜益謹厥終士

奇等對曰臣等猥蒙委任敢不勉圖報稱上大悅  
賜象笏幘頭公服尋賜二品織金紵絲衣士奇等  
入謝且言恩禮太過上曰卿等翊贊之功不在尚  
書下故特賜二品服以示旌異豈為過哉

同上

明永樂中上時至閣中必有厚賚或閱諸學士及庶  
吉士所製詩文詰問評論以為樂

同上

明仁宗建弘文閣於思善門作印章命翰林學士楊  
溥掌閣事侍講王璉佐之親舉印授溥曰朕用卿



等於左右非止助益學問亦欲廣知民事為理道  
之助卿等如有建白即以此封識進

明典故紀聞

明宣德初內閣學士楊士奇等被賜玉帶瑪瑙鶴頂  
龜簫琥珀花犀合香諸帶及龍骨等繫腰皮裘黑  
貂銀鼠帽少詹事曾棨王直賜寶帶王英賜金鑲  
琥珀麒麟帶各有差

翰林記

明宣德三年七月召尚書兼學士蹇義夏元吉楊榮  
楊士奇等同遊東苑上命臨河舉網得魚數尾令

中官具酒饌賜魚羹既而賜以金帛絛環玉鉤等物又賜宴於東廡被旨盡醉而歸

同上

明宣德四年十月車駕幸文淵閣周視大學士寓直之所命增葺屋宇兼賜飲饌器用次日謝恩已而復賜詩及寶鈔學士李時勉等皆預焉七年駕幸史館賦招隱之歌學士錢習禮等迎謁俱被賜賚

同上

明宣德八年四月命羣臣遊西苑翰林則少傅楊士

奇楊榮少詹事王英王直侍讀學士李時勉錢習  
禮與焉中官傳上命賜黃封之酒御廚之珍爵數  
行時久未雨忽陰雲東來微雨霑席相與引滿勸

酬盡醉而出

東里集

明宣德中賜楊溥第在東安門外天順元年冬賜李

賢甲第一區

同上

明宣宗初即位起學士李時勉用之一日幸文淵閣  
賜諸學士飲呼時勉謂曰卿非朕安得飲此酒時

勉頓首謝他日侍遊東苑上賜時勉酒酌以上所  
御金甌時勉辭曰臣可與陛下同飲不敢與陛下  
同器上悅命賜以銀爵既醉上出御製詩俾和之

翰林記

明宣宗初特詔翰林諸詞臣還鄉焚黃

同上

按焚黃之式起於宋時蓋為居官晉秩以封贈誥  
詞別騰於黃紙而焚之榮其親也

明天順中賜大學士李賢陳文等玉帶學士呂原等

金帶暨玉杯錦服貂帽之賚歲無虛月

同上

明成化中學士王憲掌院事賜金帶侍讀學士彭華攝詹事亦賜金帶故事學士非典密務侍日講者不與是賜蓋異數也

同上

明成化中憲宗一日於內庫得古帖斷爛不可讀命中使持至內館使理之適檢討傅瀚在直次為韻語須臾而成上大悅有珍饌法酒之賜

同上

明正德五年寧夏平賜大學士賞功金牌而詹事學

士及日講官皆預焉前此未有也

翰林記

皇朝

祖宗嘉惠詞臣寵榮備至

皇上親臨院署右文稽古備詳

盛典卷中茲不載述若夫恩遇之見於

列朝者懿文洽禮皆類次焉

優眷

世祖順治十年國史院檢討王熙

召見弘文院

命以國語奏對隨擢國子監司業並

賜洪武寶訓三國志二書十一年秋擢司經局洗馬十月

熙侍直

南苑

上粹至直幄閱熙所譯書稱善久之令長直

南苑十二年隨獵

賜乘御馬十三年選日講官熙未列名

特旨擢用其年冬

上幸景山臻祿閣

召講官進講熙講堯典稱

旨命每日進講又

諭嗣後不必立講遂侍坐十四年又

諭駕出即隨不必請旨其年七月陞弘文院學士時熙父

崇簡任國史院學士

上諭曰父子同官古今所少以爾誠恪特加此恩



十六年修撰徐元文以

廷對第一特蒙

眷注嘗扈從

南苑

賜乘御馬令學士折庫納為執鞭折庫納元文館師也因

謝不敢乃改命侍衛又嘗晚對

便殿夜分

賜饌

上問從者得毋饑乎復令侍衛賜之食

聖祖康熙十二年七月

諭講官傳達禮朕或出郊外或幸南苑嘗不輟講以此翰林官員每次隨從但翰林各官俱遠離家鄉京城毫無資產扈從不免艱苦殊為可念嗣後扈從講官所用帳房及一切應用物件酌定數目由內府給與

是年十月編修張英孫在豐扈從

南苑入夜值大風雨

上在行宮謂侍臣曰兩翰林恐油幕未具得毋有沾濕之  
苦時已漏盡三鼓

命中使至學士傳達禮帳中傳

諭移於五店

皇莊安宿學士回奏臣已為二人料理何敢煩

聖慮時英等已就枕翌日學士傳

旨英等詣

行在恭謝是月

上在南苑行宮方張燈伸紙作大書中夜傳侍讀學士喇沙里至前復問兩翰林此時作何事對曰方在直

廬讀書

上曰可令兩人各賦良馬詩學士請問良馬狀

上曰此不必論古人以騏驎比君子所謂驎不稱其力稱其德也即日恭賦二律以進

十七年正月

召學士陳廷敬同戶部郎中王士正見於

懋勤殿

命各以所作詩進呈

溫語良久至誦廷敬

賜石榴子詩風霜歷後含苞實只有丹心老不迷蒙

恩褒美

命至南書房撤

御膳以賜內侍齋二題

命賦詩夜漏下乃退

是年夏

駕幸景山

命學士張英侍讀高士奇從

上賦夏日登景山同翰林張英高士奇作詩一章七月復  
御書是詩以賜英等

駕幸西山將至潭柘寺

上命士奇於馬上聯句二首

十八年五月

命內廷供奉周道寫侍讀學士張英小像裝潢成軸  
賜之

是年學士孫在豐扈從

南苑翼圖之內有麋鉞走

上以御用弓矢授在豐射得麋遂

賜之謂大臣曰孫在豐文武材也及試武進士

上復命在豐射射連中

上大悅語侍衛是固曩日射麋者也後嘗扈

駕南巡至蘇州

上傳諭云孫在豐家湖州去此不遠可一往省親瀕行復諭汝來不必至江寧第於淮揚詣行在其金陵名勝有應留名處汝係從官必為爾題名也

二十年六月侍講高士奇偶病時熱

命御醫診視

上以御札令編修杜訥謐寫於小牋之上遣內侍齎白金

五十兩



賜之

二十五年四月講官陳元龍侍班

乾清宮西煖閣啟奏畢

上顧元龍曰爾精於楷書朕素知可寫大字一幅因令就御案作書內侍濡毫伸紙

上降座立案前觀書書畢

嘉獎良久出

御書闕里碑文賜觀及退食晝漏已頻移矣二十八年

聖駕南巡至濟南登城閱視畢

回輦將下城從官皆控馬立女牆傍

上顧講官陳元龍曰爾書生可即乘馬隨朕而行勿落後  
擁擠可慮隨令中使扶元龍上馬

是年

駕至浙江杭州

幸高士奇西溪山莊

賜五言詩一首並

御書竹窻二字

三十五年秋韓莢任翰林院掌院學士累陞至禮

部尚書皆學士如故

上嘗語大臣云韓莢天下才風度好奏對亦誠實又云韓莢學問優長文章古雅前代所僅有也又云韓莢所為文能道朕意中事凡應奉文字每進一篇輒稱善館閣撰述莢必與焉

三十九年七月

諭大學士等翰林官及庶吉士內有極貧者此等如何施  
恩有並供職並給假回籍之翰林官庶吉士有生計艱  
難無力至京者該督撫酌量資助令其來京又各省學  
道不差翰林官嗣後應一併差遣爾等議奏尋議各省  
學道自講讀以下應列名請差翰林官貧乏者月  
給銀三兩得

旨依議翰林官所學優長朕俱知之但其為人尚未深悉  
此後學道缺出除告假在籍日期不論外較俸派出互

見職掌卷中

四十二年二月中允蔡升元恭迎

聖駕

召入御舟問對移時

天顏溫霽問爾同年皆為大僚爾何故久不來京升元以

三代未葬為對行十餘里

命中使引上副舟仍令移傍

御舟

上諭明日至杭州再賜爾字十六日恭進迎鑾詩

聖壽萬年頌

上披閱之下再三稱賞隨令入

行殿

命侍衛海青傳

旨蔡升元在講筵甚久家計甚貧爾祖父墓事約須多少朕給爾所費升元感激涕零不知所對海青隨傳

旨賜銀六百兩且令事竣速即來京又

賜御書臨黃庭經綃字一幅

四十三年詹事陳元龍以親病乞歸繕疏送通政

司仍赴

苑中內直中使傳

旨云爾告歸之疏已達覽閣票該部議奏俟部中具覆再下旨時幾及一月爾思親念切且天氣漸熱可即起身不必等候復

賜人葎二斤傳

旨云可攜歸奉爾父也

四十四年三月詹事陳元龍迎

駕

上倚船窻慰問詢及爾父老年無恙否元龍進呈臣民望

幸詩冊四月

賜御書南陔日永堂扁額

御製詩集一部

皇輿表一部又



賜元龍父陳之闇內製砥石硯一方

御書金扇一柄閏四月又

賜之闇人葎二斤並追

賜元龍母陸氏慈教貽庥扁額傳

諭云爾有老親在家可從此辭歸不必遠送

是年五月

上御淵鑒齋召大學士張玉書陳廷敬尚書王鴻緒少詹  
蔡升元學士查昇陳壯履王原祁編修楊瑄勵廷

儀張廷玉錢名世查慎行蔣廷錫等入至雲步石  
賜坐賜饌畢人賜荷花一瓶隨命由蕊珠院延賞  
樓泛舟回直廬

四十八年三月

召內廷翰林入淵鑒齋乘舟至瑞景軒蕊珠院露華樓遍  
觀各種牡丹

皇上乾隆七年二月右庶子張鵬翀進奏經史

召對便殿

溫語移時

賜御書文綺鵬翀作紀恩詩六章次日畫春林澹靄圖

進呈即題其上

上用元韻俯和

龍章立就筆不停綴兼

命大學士張廷玉傳

諭乘興偶成非誇多闢靡蹈翫物喪志之戒鵬翀復於

宮門賡韻以進

上嘉其敏捷復

賚松花綠石硯一方鵬翀又嘗進日長山靜便面并詩  
上仍用其韻

立賜詩八章先後進和詩不可勝紀

謹按自古君臣倡和如帝舜皋陶之賡歌成王召  
穆公之遂歌尚已三代以下若唐太宗宋仁宗君  
臣間並得拜賜矢音之遺意然皆君倡臣和者為  
多

皇上於臣下之作

特賜和章且軫民依則座乎重農望雨之心眷詞臣則  
擬以撤燭送歸之事視昔鳳池榮遇倍萬過之敬

登

聖製鴻篇於藝文卷中以誌曠典

是年十月

上於紫光閣閱武舉騎射講官張鵬翀侍班屢荷

天語垂問試畢會瑞雪應時而降

上賦太液池泛舟咏雪示詞臣張鵬翀五言律一章

宣鵬翀登

御舟

賜坐給筆札

命和詩畢隨

輦入朝賦咏雪紀恩詩四章進呈復

示詩二章

命翌日和進

沈德潛以乾隆四年己未入翰林

上知其績學晚遇

眷顧有加

聖製詩成時

命賡和嘗以所作詩文進

上賜和覺生寺大鐘歌即用其韻有我惜德潛老始達  
之句至乾隆十一年丙寅德潛晉階內閣學士九

月朔請假葬親

上賦五言長律一章以

寵其行

召見西暖閣

垂問何日還朝

恩禮款洽並

允德潛請

特賜誥封三代

上復賦五言律一章十二年丁卯假滿赴



闕

上為賦沈德潛乞假葬親畢還朝詩以賜之五古詩一章以請假時奏對及還朝月日故

聖製有朋友重然諾況在君臣間之句以未還朝時先命隨侍

皇子讀書故有善為道孔顏之句並載藝文中  
遷擢

世祖順治十年五月

諭吏部翰林官陞轉舊例論資俸兼論才品朕思果有才  
品特出者何必拘於舊例右春坊右中允仍管內翰林  
祕書院修撰事呂宮文章簡明氣度閒雅朕所親見著  
遇學士員缺即與推補以示破格用人之意

是月又

諭吏部內翰林弘文院修撰麻勒吉會試殿試皆居第一  
同庶吉士教習有志向學朕觀其氣度老成兼通清漢  
文義遇有侍讀學士員缺即行推補

十一年正月

諭內院朕時蒞內院每見祕書院侍講卓彞在院供職勤慎可嘉著特陞一級以示獎勵

聖祖康熙元年正月

諭吏部原任大學士希福范文程寧完我額色黑皆自

太宗文皇帝時歷任內院贊理機務効力最久勤勞素著

其子宜加擢用以示鼓勵范文程子范承謨額色黑子塞色黑已補授內院學士希福寧完我各一子亦著以

學士用

十六年三月大將軍和碩康親王傑書將福建不肯從逆之編修李光地等題請議叙得

旨李光地不肯從逆差人密奏地方機宜忠貞茂著深為可嘉著從優議叙尋授光地額外侍講學士明年十一月鎮東將軍喇哈達疏言泉州在籍侍講學士李光地遣人至臣軍中為大兵鄉導由漳平縣朝天嶺小路入安溪縣復遣人修通險道接濟軍需又

躬迎大兵文臣為國盡勞請加議叙得

旨李光地當閩地變亂之初不肯從逆具疏密陳機宜殫竭忠貞今又遣人迎接大兵指引道路平險隘治浮橋餽食物餉軍率民兵備辦糧米供給兵衆口糧矢志滅賊實心為國深為可嘉著從優授為學士

十九年四月

上以日講起居注各官俱學行優長簡備顧問講解明晰奉職勤勞

勅部從優議叙議上

上命掌院學士葉方鵠加禮部尚書銜詹事沈荃加禮部  
侍郎銜侍讀學士蔣弘道侍講學士崔蔚林嚴我  
斯加詹事銜侍講董訥王鴻緒加侍讀學士銜侍  
讀學士張英授為翰林院學士兼禮部侍郎內閣  
中書高士奇授為翰林院侍講食原品州同俸杜  
訥授為翰林院編修左春坊左庶子張玉書加詹  
事銜翰林院學士庫勒納詹事格爾古德侍讀學

士牛鈕常書侍講學士朱馬泰侍讀阿哈達俱於  
現任內各加一級

二十三年擢少詹嚴我斯侍講董訥俱為禮部侍  
郎兼侍讀學士

四十年擢侍讀學士許汝霖為工部右侍郎

四十四年四月

諭大學士等原任翰林院侍讀徐倬年逾八十學問淵博  
可特授禮部侍郎銜以示優獎

五十一年正月擢原任大學士張玉書子編修張  
逸少為翰林院侍讀學士

世宗雍正四年九月吏部奏翰林告病休致之員恭逢  
恩詔俱准補用嗣後凡患病告假者或仍令休致或准其  
起用得

旨准其起用

謹按康熙五十三年二月以翰林編檢庶吉士多  
告假者因令照致仕知縣例不准補官至是復邀



寬典均得起用

五年二月以河清恩

命翰林院修撰編修檢討各加一級

皇上乾隆三年九月

諭內閣廣東庶吉士劉起振年屆九十遠來京師著授  
為翰林院檢討准其回籍

謹按庶吉士例以三年散館後授職或

恩加不次未及散館先予授職者或已逾散館之期免

其補試即予授職者如順治間則有宋德宜崔蔚  
林康熙間則有沈宗敬勵廷儀汪灝蔣廷錫查慎  
行梅穀成雍正間則有黃之雋張廷珩張泰基蔣  
溥張若靄至是劉起振以未經散館特蒙

擢授前後如朱璣張若澄梁啟心並除編檢而已未之  
涂逢震以未散館即陞中允尤為異數云

又按雍正九年四月

命左都御史史貽直等率翰林院庶吉士等官前往陝甘

二省開導訓諭十年四月事竣得

旨議叙鹿邁祖孫灝朱鳳英佟保孫人龍俱授編修陳中

薛馥李賢經色通額俱授檢討

又按原任庶吉士董泰以分教庶吉士

國書於乾隆四年復授庶吉士七年免散館授職編  
修皆非常格也

四年十月侍讀王圖炳請告

命加詹事銜並

賜內造緞寧絀各二端

侍宴

聖祖康熙十二年六月

上幸瀛臺御迎薰亭賜諸王以下諸臣及翰林等官宴大學士索額圖兵部尚書明珠傳

諭曰諸臣日理政務略無休暇今值荷花盛開夏景堪賞朕特召諸王貝勒等及爾諸臣同宴以示君臣偕樂其各盡歡以副朕優渥至意大學士圖海奏曰臣等躬逢

盛世媿無寸長仰酬萬一今荷

隆恩賜宴

天語慇懃雖家人父子無以踰此於是

上率諸王貝勒等於南河登舟各官次第於北河登舟往  
來賞宴畢諸王及各官謝

恩出

十八年正月

上幸西苑泛舟詞臣侍宴

二十年七月

賜內閣部院翰詹科道等宴於

瀛臺

命侍讀學士張英同內大臣主席又令內大臣佟國維等  
傳

諭曰內閣及部院各衙門諸臣比年以來辦事勤勞今特  
召集爾等賜宴因朕方駐瀛臺即以太液池中魚藕等物  
賜諸臣共食之又

賜綵緞表裏大學士率諸臣叩謝各依次坐

上命內大臣等以金尊

賜飲一巡宴畢諸臣各謝

恩出越日詞臣各撰詩賦以獻

二十一年正月

上御乾清宮宴內閣九卿及翰詹日講官科道等九十三

員

上命學士張英侍講高士奇傳

諭曰向來內殿筵宴諸臣未與今因海內乂安時當令序特於乾清宮賜宴君臣一體共樂昇平用昭上下泰交之盛諸臣當歡忭暢飲以副朕懷大學士李蔚奏曰

皇上特恩曠典千載一遇臣等不勝感激奏畢分左右班以次序進樂作各就位一叩頭坐

上進膳諸臣乃飯

上命各飽飫盡量少選撤饌更設肴核酒觴既陳大學士

勒德洪至



御前跪進酒上壽畢

上命大學士尚書都御史侍郎學士以次至

御座前親賜飲以下諸臣俱令至

御前賜飲又令張玉書張英傳

諭曰今日內殿嘉宴特勅諸臣笑語無禁諸臣奉

詔暢飲極歡樂奏二闋

上復命張玉書張英傳

諭宴畢時諸臣可近御座前觀燈朕更賜以卮酒既撤筵

諸臣以次出

上命羣臣有霑醉者令內官扶掖而行

上召張玉書陳廷敬張英諭曰每見漢唐以來君臣同樂  
有賡和之詩今朕雖不敢效古先聖王亦欲紀一時之  
盛可做柏梁體賦詩進覽廷敬奏言臣等草野賤士得  
覩

天家景物蒙

聖恩深厚真明良喜起之休臣等身際休明受恩逾深但

愧報稱愈難於是廷敬等出宣

旨羣臣奏曰臣等敢不歌詠太平但恐不能賡颺

聖德大學士李霽言柏梁體詩首一句當恭請

皇上御製廷敬復入奏

上曰明日早發翊日廷敬等至

宮門祇候侍衛捧

御製詩序出羣臣集

太和殿下以次賦詩凡九十三韻比詩成恭進

御書詩序詩則

詔詹事沈荃書之刻石養心殿摹榻裝潢九月九日

賜與宴諸臣人一冊又

賜不與宴大學士王熙學士牛鈕各一冊

二十二年正月

召大學士九卿詹事日講官科道等

賜上元節宴於

乾清宮宴畢諸臣謝

恩出復

召大學士明珠學士張玉書牛鈕陳廷敬

諭曰今日因上元令節特賜卿等宴以示優眷尚有馴馬  
內幣令於掖門外頒賜朕念諸臣中有年力衰老不能  
久坐者故夜漏未闌遂爾罷讌恐口諭未悉朕懷茲書  
諭旨一道示卿等可傳示諸臣知之諭曰從來君臣之  
分雖甚尊嚴上下之情貴相浹洽常觀唐宋盛時堂廡  
不隔以成交泰之治卿等朝夕勤勞出入奏對朕心時

切嘉念今將內殿馬匹及滇中新到馬匹擇其馴良易  
於控御者頒賜卿等加以內紵卿等其各承受示朕優  
眷之懷大學士各表裏六足馬一匹尚書左都御史各  
表裏五足馬一匹侍郎學士副都御史各表裏四足馬  
一匹通政使大理寺卿詹事日講官各表裏三足科道  
各表裏二足

二十三年元旦

南書房翰林宴歸

上復遣內侍以肴果二席各

賜於其家

世宗雍正四年正月

召大臣及內廷翰林等

賜宴於

乾清宮宴畢

頒賜

聖祖御批通鑑綱目各一部並蟒緞貂皮合包等物

是年九月九日

上御乾清宮西暖閣召

皇子諸王大學士九卿以下翰詹科道及武大臣之能  
詩者九十四員賦栢梁體詩

欽定八庚韻硃書黃籤分給諸臣各一字授几賜坐筆墨  
爍陳酒肴并列內侍傳

諭今日賦詩式燕用昭君臣一體之誼諸臣毋得過拘禮  
節能飲者不必限以三爵諸臣聆



諭方共持杯染翰

御製先成

命大學士張廷玉捧示諸臣涵益萬有義蘊精深諸臣詩

句次第構就書於分韻黃籤進呈

皇子諸王及大學士九卿等至

御前進酒上壽

上親賜

皇子諸王大學士尚書都統等飲命

皇子諸王分賜諸臣飲諸臣叩首跪飲畢趨候於

乾清門外少頃復召至

乾清宮

上陞寶座

皇子諸王及文武諸臣分東西兩班序坐作樂進膳賜

食演劇宴畢王以下諸臣謝

恩趨出復

賜饅餅瓜果等物有差

五年九月九日

上御正大光明殿

賜諸王大臣宴及緞疋有差并以雍正四年重陽慶宴栢

梁體詩墨刻

賜諸王大臣及翰詹等官各一冊

皇上乾隆四年正月

召集諸王大學士九卿翰詹科道等於

乾清宮賦栢梁體詩

錫賚有差

十一年八月

諭內閣康熙二十年七月我

聖祖仁皇帝駐蹕瀛臺特召大學士以下各部院衙門官員賜宴命內大臣傳諭慰勞賞賚有差至今稱為盛事朕臨御以來仰賴

上天眷祐海宇乂安今歲京師雨暘應候百穀蕃昌畿輔共獲有秋各省亦多收穫

天庥滋至我君臣應額手慶成今當秋風薦爽景物咸和  
念茲宗藩瓜瓞誼屬本支大小臣工宣猷効力宜循  
往典錫之宴享以昭君臣一體之意叶笙簧酒醴之  
歡著於瀛臺設宴本月二十七日宴王公及近支宗  
親二十八日宴大學士九卿京堂翰林科道載考古  
昔君臣有賞花釣魚宴飲賦詩之事諸臣內或文學  
侍從或翰墨素嫻者著入宴賦詩以效賡颺喜起之  
風焉二十八日

賜大學士九卿京堂翰林科道等宴於

瀛臺

御筆親定

涵元殿入宴者大學士以下凡四十有八人入宴崇  
雅殿者又若干人屆期諸臣集

勤政門外祇候日既升

上御輦入

西苑門下輦升龍舟列鹵簿於沙隄鼓吹並作

上升隄乘小輦入

勤政門至

涵元殿諸臣隨入班齊樂作行禮如大朝儀禮畢諸臣以次詣席一叩頭坐尚膳進茶諸臣皆跪

上御茶畢侍衛以茶分授諸臣皆跪飲尚膳進

御饌承應上陳栢臺賦詩故事侍衛以饌分授諸臣進爵大臣捧觴上壽

御前諸臣皆跪

上賜進爵大臣酒畢

召大學士訥親張廷玉福敏史貽直尚書梁詩正來保  
阿克敦汪由敦哈達哈納延泰侍郎傅恒至

御前賜酒又

召侍郎蔣溥舒赫德內閣學士沈德潛

賜酒侍衛以酒分授諸臣飲醕承應止諸臣趨階下謝  
宴行禮如初是日也天和日晶景物融暢

上用唐李嶠甘露殿應制詩韻



御製月字霞字二首大學士以下分韻者凡三十有八

人復

命兩殿與宴諸臣倣栢梁體

御製首句諸臣以次賡韻詩成內侍傳

旨令諸臣各泛舟選勝於是黃頭並進錦纜齊牽至中

流復

宣大學士等選工詩者至流杯亭聯句於是大學士陳

世倌及侍講學士周長發檢討陳兆崙編修朱荃

程景伊朱佩蓮修撰金牲偕三十八人俱赴亭中  
內侍傳

旨各以意坐無拘班列

上用十一真韻賦起二句又出一句諸臣各蟬聯對屬  
每臣工五人聯畢

上仍續四句如是者數四

天章絡繹泉湧風飛諸臣皆愧汗不能屬謂自古帝王  
未有如此之淹雅鴻麗天縱神速者也維時內侍

持鈿榼列餽飮清流激湍中茵蔯承杯就所在而  
分布焉俄而不傳警蹕

玉趾親臨諸臣迎跪進詩

天顏晬穆

溫諭再三

駕回復遍

宣與宴諸臣赴水亭垂釣柔絲芳餌錦鬣爭飛既而復

赴

勤政門

賜御書文綺珍果鮮鱗諸臣拜賜而歸翌日上表謝

恩

賚予

賚予以

已上優眷遷擢侍宴中皆有

恩出一時未便分列仍各附本條外若  
賜寶翰第宅銀幣圖籍筆硯服食等並詳於此

世祖順治十三年二月以右庶子王熙精通

國書

賜御服貂裘一襲並表忠錄一部是月復

賜王熙等八人滿文資政要覽人臣儆心錄各一部

聖祖康熙十二年二月

諭學士傅達禮爾衙門所進繙譯大學衍義一書朕恭呈  
太皇太后御覽奉

慈諭云人主居四海臣民之上所關甚鉅然代天理物端  
在躬行致治興化必先修己此書法戒畢陳誠為切要  
爾特加意是編命儒臣繙譯刊刻更令頒賜諸臣予心

欣悅特發內帑白金千兩可即賚予在事諸臣朕仰遵  
慈旨頒賜爾等其欽承之

是年十月

賜講官紫貂白金文綺同時受賜者掌院學士熊賜履侍  
讀學士楊正中杜臻陳廷敬侍講孫在豐編修葉  
方藹史鶴齡張英八人

十六年三月

命學士喇沙里以翰林官所作詩賦詞章及真行草書進

呈

上召至懋勤殿親自披閱令書漢字呈覽以

御臨蘇軾楷書手卷一軸賜之

是年五月

賜講官陳廷敬張英葉方藹

御筆楷書清慎勤三大字草書格物二大字及趙孟頫所

書不自棄文石刻

是年六月

召侍講學士張英至

懋勤殿

上講中庸及太極西銘之學

命張英敷陳經書大義復

親灑宸翰書忠孝存誠大字二幅以賜又

賜詹事沈荃龍飛鳳舞忠恕等墨蹟

是年九月

上御懋勤殿



諭講官喇沙里陳廷敬張英爾等每日進講啟導朕心甚  
有裨益嗣後天氣漸寒特賜爾等貂皮各五十張表裏  
緞各二疋

是年

賜張英高士奇居第各一所於西華門內互見職掌卷中  
謹按詞臣倬直

禁城向無邸第是以

特恩賞給同時如編修勵杜訥檢討朱彝尊等均得被賜

馬

十七年閏三月

賜侍講學士張英涼帽韉襪及羅紵表裏是時學士陳廷

敬葉方藹侍讀王士正同入內直

上頻賜櫻桃蘋果及櫻桃漿乳酪茶六安茶等物其茶以

黃羅緘封上有六安州紅印四月復

賜天花

特頒手勅云朕召卿等編纂適五臺山貢天花鮮馨罕有

可稱佳味特賜卿等使知名山風土也用烏絲闌書又  
賜講官陳廷敬葉方藹王士正

御書人二幅士正得存誠二字唐人張繼楓橋詩廷敬得

龍飛鳳舞四大字唐詩一首

曲江垂柳一條云云

方藹得

存誠二字唐人崔國輔詩

遺却珊瑚鞭云云

別賜士正石

刻二幅一清慎勤三大字一格物二字

諭云去冬曾以石刻賜講筵諸臣時爾士正未與故特頒  
賜八月士正同陳廷敬葉方藹張英入直和

御製賜輔國將軍俄啟詩仍令次日攜名字印章入內各

書一幅即發

養心殿裝潢隨

御筆同賜之

是月

賜學士張英新貢龍井天池珍茗二瓶高麗人葠一函

十九年六月

上以御書卷軸賜學士庫勒納葉方藹詹事格爾古德沈

荃侍讀學士牛鈕常書崔蔚林蔣弘道侍講學士  
張玉書嚴我斯侍講董訥王鴻緒各一

諭曰爾等為文學侍從之臣即有成就德業之責故因所  
請輒以頒賜其悉朕意

二十一年二月學士張英請假葬父

特頒手勅曰諭張英爾素性醇樸侍從有年朝夕講筵恪  
恭盡職茲因爾父未葬具疏請假朕念人子至情忠孝  
皆出一理准假南還特賜白金五百兩表裏二十疋既

旌爾之勤勞兼資墓田之用爾其欽悉惓惓至意

二十三年十月

諭江寧巡撫湯斌曰吳中縉紳汪琬原係翰林為人厚重  
學問優通且居鄉安靜不預外事特賜御筆手卷一軸  
爾遣人付與不必令其來見著即在家謝恩

三十二年

賜掌院學士韓爌

御書篤志經學四大字

三十四年三月

賜講官陳元龍

御書鳳池良彥四大字三十七年復

賜御書手卷一軸三十八年復

賜內製松花綠石硯一方

是年學士張廷璣扈

駕南巡

賜御書玉堂二大字又

賜御書傳恭堂扁額

是年

駕至蘇州在籍檢討尤侗進頌及詩

御書鶴棲堂三大字以賜

謹按詞臣

恩賜寶翰皆在朝者為多先是惟汪琬以在籍蒙

頒御書嗣如浙江在籍少詹事邵遠平亦得

賜蓬觀二字並稱殊典云



四十年四月

上御便殿作書

召內直翰林賜觀

諭云爾等家中各有堂名不妨自言當書以賜陳元龍跪

奏臣父年踰八十擬請愛日堂三字

上即揮毫賜之

謹按前此頒賜從臣堂顏多隨其職任所在以寓

獎勵茲復

命書其所欲書者以進尤見體羣臣之盛意同時諭德查昇擬上澹遠二字亦得所請焉

四十一年

召大學士九卿翰詹等至

保和殿

頒賜御書有差

諭曰尋章摘句非帝王本務朕四十餘年惟日兢兢未嘗晷刻稍釋萬幾政事之暇偶好書射歷年所積臨摹字

幅以賜卿等

是年

聖駕南巡在籍諸臣來朝

特賜侍講蕭惟豫編修田需各

御書一幅傳

旨以爾二人乃老翰林故有是賜

是年六月

御書道德仁藝四字賜翰林院德業仁義四字賜詹事府

四十二年春

聖駕南巡至吳又

賜在籍檢討尤侗字幅卽於其家擢授侍講

是年四月

賜內直翰林

御書扇五月

上避暑口外講官被賜紗葛衣各一襲六月

駕幸釣臺

召隨駕講官賜饌釣魚又以玉饌紅蓮米飯柳根魚羹

賜之先後

賜食不可勝紀

四十三年三月庶吉士蔣廷錫以迎養其母請假

歸里

上賜第苑西以待之

是月

賜內直翰林食榆錢糝五月復

賜高麗米糴

諭曰此米出高麗自

太宗朝歲貢百石為端午上供

四十四年正月

賜少詹事蔡升元

御書世恩堂匾額

是年

上巡幸塞外

諭翰林張廷玉勵廷儀蔣廷錫查慎行錢名世等曰昔  
太宗皇帝謂此地宜立田牧今果蕃息若此因

賜各官馬一匹羊二頭

是年七月

賜講官查慎行

御書敬業堂扁額

五十五年三月

賜翰林諸臣松花綠石硯中使宣

旨查慎行吳廷楨廖賡謨宋至吳士玉五人向在武英殿纂修着揀式樣佳者給與

五十六年正月

賜大學士及翰林官周易折中各一部

世宗雍正三年十月

賜翰林詹事官扁綾一百幅

六年九月

賜翰詹諸臣



世祖章皇帝御製人臣儆心錄各一部

十三年四月

賜翰詹諸臣

聖祖仁皇帝御製全集各一部

皇上乾隆元年六月

諭內閣翰林余棟丁母憂著賞給內庫銀五百兩為喪事之用

三年九月

諭內閣今日編修彭樹葵奏進經史講義引用魏徵十思疏內之語以為人君之德在於慎思且衍十思之義為箴十首詞亦典雅尚近古人箴規之意與泛論經史者不同甚屬可嘉著賞內用緞二匹筆墨二種以示優獎

四年四月

賜翰詹諸臣

世宗憲皇帝御製文集各一部

是年五月明史告成

賜本館官及

武英殿翰林官人各一部

五年十月

賜翰詹諸臣

御製樂善堂文集日知薈說各一部

六年正月

賜翰詹諸臣

欽定四書文各一部

九年四月

賜翰詹諸臣

御製盛京賦各一部

十年正月

賜翰詹諸臣

御製圓明園四十景詩各一部

詞科

聖祖康熙十七年正月

諭吏部自古一代之興必有博學鴻儒振起文運闡發經史潤色詞章以備顧問著作之選朕萬幾餘暇游心文翰思得博學之士用資典學我朝定鼎以來崇儒重道培養人材四海之廣豈無奇才碩彥學問淵通文藻瑰麗可以追踪前詒者凡有學行兼優文詞卓越之人不論已仕未仕令在京三品以上及科道官員在外督撫布按各舉所知朕將親試錄用其餘內外各官果有真

知灼見在內開送吏部在外開報督撫代為題薦務令  
虛公延訪期得真才以副朕求賢右文之意於是大學  
士李蔚等薦原任副使道曹溶等七十七人

上命俟各員赴部齊集之日請旨其在外現任者不必開  
缺是年十一月大學士承

旨令戶部酌議貼給俸廩并薪炭銀兩按月稽領十八年  
三月初一日

御試博學鴻儒一百四十三人於

體仁閣

賜宴時陪宴者吏部尚書二員掌院學士二員

欽命題璿璣玉衡賦省耕詩五言排律二十韻既納卷

命大學士李蔚杜立德馮溥掌院學士葉方藹閱卷進呈

御定一等彭孫遹等二十人二等李來泰等三十人俱令

纂修明史其作何分別授職及未取人員內有年

老者作何量給職銜俱下部議尋議上

上命閣臣取前代制科舊例來閱閱畢

上乃降旨薦舉取中人員俱授為翰林院官應給職銜者  
再議具奏其杜越傅山王芳穀等文學素著念其  
年邁從優加銜以示恩榮於是吏部復議已仕者  
俱照品級授講讀官坊編修等未仕者概授檢討  
纂修明史杜越等俱授內閣中書聽其回籍從之  
其各員中選名第先後及擢授官階等差詳著題  
名卷中

世宗雍正十一年四月



諭內閣國家聲教覃敷人文蔚起加恩科目樂育羣才彬彬乎盛矣朕惟博學宏詞之科所以待卓越淹通之士俾之黼黻皇猷潤色鴻業膺著作之任備顧問之選

聖祖仁皇帝康熙十七年

特詔內外大臣薦舉博學鴻儒召試授職一時名儒碩彥多預其選得人號為極盛迄今數十年來館閣詞林儲材雖廣而宏通博雅淹貫古今者未嘗廣為搜羅以示鼓勵自古文教休明之日必有瑰奇大雅之才况蒙

聖祖仁皇帝六十餘年壽考作人之盛涵濡教澤薄海從風朕延攬維殷闢門籲俊敦崇實學諭旨屢頒宜有品行端醇文才優贍枕經藉史殫見洽聞足稱博學宏詞之選者所當特修曠典嘉予旁求除現任翰詹官員無庸再膺薦舉外其他已仕未仕之人在京著滿漢三品以上各舉所知彙送內閣在外著督撫會同該學政悉心體訪遴選考驗保題送部轉交內閣務期虛公詳慎搜拔真才朕將臨軒親試優加錄用廣示興賢之典茂

昭稽古之榮應行事宜著大學士九卿會議具奏十三年二月以直省奏薦人員尚少復

勅內外大臣廣行遴選十三年十一月

皇上諭內閣國家久道化成人文蔚起

皇考樂育人材

特降諭旨令直省督撫及在朝大臣各保舉博學宏詞以備制作之選乃直省奉

詔已及二年而所舉人數寥寥朕思天下之大人材之衆

豈無足膺是舉者一則各懷慎重觀望之心一則鑒  
衡之明視乎在已之學問或已實空疎難以物色流  
品此所以遲回而不能決也然際此盛典安可久稽  
朕用再為申諭凡在內大臣及各省督撫務宜悉心  
延訪速行保薦定於一年之內齊集京師候旨廷試  
倘直省中實無可舉亦即具本題覆乾隆元年二月  
諭內閣內外臣工所舉博學宏詞聞已有一百餘人祇  
因到京未齊不便即行考試其赴考先至者未免旅

食艱難著從三月為始每人月給銀四兩資其膏火  
在戶部按名給發考試後停止若有現任在京食俸  
者即不必支給並行文外省令未到之人俱於九月  
以前到京若該省無續舉之人亦即報部知之免致  
久待尋大學士等奏保舉博學宏詞一百七十六人  
應照康熙十八年例行至期赴

太和殿前考試

上諭天氣漸寒著於保和殿內考試九月二十六二十

八二日

御試保和殿

賜宴

欽命第一場題五六天地之中合賦以敬授民時聖人所先為韻賦得山雞舞鏡詩七言排律十二韻得

山字黃鍾為萬事根本論

欽命第二場題

制曰儒者之學莫尚於窮經經籍浩繁毋煩臚舉今試

撮其大綱凡通儒所宜共曉者為多士詢焉經之名  
昉於何時五經六經七經九經十一經十三經之名  
分於何代秦燬雖烈而不能掩其光者藏於何人所  
藏何書其後出於何地獻於何朝頒於何世各經授  
受源流何所依據章句註疏傳解箋詁之屬有何異  
同其施諸學宮用以取士者何所因革又如古有三  
易夏何以稱連山殷何以稱歸藏周何以稱周易且  
連山不始於夏歸藏不始於殷周易不始於周其說

可得聞歟傳周易者有四家其興廢可得考歟書何以有古文今文之別詩何以有齊魯韓毛之殊春秋左氏公穀而外又何以有鄒氏夾氏鐸氏虞氏之類諸家分門別派其說可悉數歟禮始於高唐生顯於后蒼其轉相傳述者誰歟二戴何刪馬氏何補冬官何缺儀禮何逸羣儒議論紛紜其說可詳陳歟論語何以有魯論齊論大學孝經何以有古本今本爾雅或曰周公作或曰子夏作其說何居孟子何以或刪



或疑或異或尊何其識之相遠歟惟中庸無異說而學庸二篇原皆載於戴記其別為詮說而列於四書者自何而始歟凡此經傳源委其能條分縷析闡其微言抉其奧義而銖黍之不爽歟漢唐以經學取士或專通或兼通或帖十通五皆得與選舉之格多士果能博學該通條對精詳斷制明決者固膺上第即或就所已知各行所見而言有條理詞歸雅馴亦足以備採擇其悉言無隱朕將親覽焉

制曰儒者學術之要先經次史凡具淵通之學必擅著作之材然非熟於掌故周知上下數千載之事理而剖決其是非者不足以語此則史學尚矣今之稱正史者皆曰廿一史豈廿一史之外別無正史歟又豈正史之外別無他史歟考之漢唐宋藝文志及隋經籍志所載諸史其名類甚多而稱史學者惟以班馬諸人為宗何歟史記漢書成於遷固不自遷固始也開之者誰補之者誰註解之者又誰也范史一書與

馬班並稱三史而袁宏荀悅之作獨不可媲美歟陳  
壽之志帝魏退蜀正統已紊孰稱其是孰正其非可  
與三史並傳歟即三史之書又果無遺憾歟晉書創  
於何人共有幾家唐太宗命房喬等再加撰次其稱  
房喬者何人也其稱房喬等者又共幾人也觀其文  
多駢麗史體固應然歟南北史皆成於李延壽而考  
之南朝北朝各有專史乃延壽復為合之合者可取  
則專者宜刪專者既行則合者可廢而八書二史皆

得並行辭多重複後之作者獨不可彙而修之歟六朝之後隋書頗善其所撰諸志綜覈尤工近世儒者專稱五代史而不及隋書又何說也唐書新舊二編各有短長自新書出而舊書流布無多不得並載十七史中其故何歟梁唐晉漢周皆有史薛居正嘗修之歐陽氏之本誠善矣而薛氏之本猶可得見歟宋遼金三史已不及前代而元史成於倉猝舛謬尤多乃後儒罕能刪定以成佳史豈古今人果不相及歟

且史之體有二曰編年曰紀傳紀傳之善自司馬遷  
史記始而編年之善則自司馬光通鑑始通鑑本春  
秋之法至朱子則綱仿春秋目仿左氏而前編續編  
之作亦皆得其遺意此外體例甚繁沿革互異作史  
者奚啻數百家多士有能悉數其姓氏詳其名目以  
證其是非者歟將備舉作者之優劣以考正諸史之  
得失則一代著作之任殊有厚望焉母勸說母雷同  
母苟且以干名母徇人以自誤有志進取者尚慎旃

哉其各矢乃心獨抒所見以毋負朕延訪之至意越

日

命大學士鄂爾泰張廷玉吏部侍郎邵基閱卷擬取一

等五人二等十人

上親加裁定令分別授職於是大學士等察例以聞一

等劉綸等五人均授翰林院編修二等楊度汪等

十人內由科甲出身者授翰林院檢討餘授翰林

院庶吉士十月初五日引

見養心殿

賜御製日知薈說人各一部二年七月十一十三二日  
御試被薦續到博學宏詞於體仁閣

賜宴

欽命第一場題

制曰士不通經不適於用治經之學於民生本務先王  
體國經野之宜尤所當考詳而切究者周禮九職首  
列三農所謂三農者以地別耶以人別耶其各見於

注疏者同異若何禹貢之三壤周禮之再易爾雅亦  
曰三田又何所稱指也上農夫食九人下至五人又  
何差別之殊也夫通勞逸而人力可均畫井疆而地  
利先辨井田五義見於何書條目若何五地九土九  
地九田九等十二土分見於何書其條目若何多士  
剖析言之無泛無隱朕將親覽焉

制曰稽古碩儒名臣嘉猷讜論彪炳方策略舉數端聊  
用咨詢夫六籍之微言無論已三本六務三具四齊



其說維何賢良三策鼂董不同者焉在言世務書嚴  
徐所見者孰優仲長統之稱政論申鑒之詳政體其  
言可采者皆得而敷陳歟嗣是而後莫切於十思之  
疏五規之論至以十事陳說唐宋諸臣不一而足何  
人何事孰為得失可得而論述臚列歟伊川言先務  
紫陽言大本純儒之學異於管荀諸人者又何在也  
多士數其辭陳其義能條對者朕嘉與之

欽命第二場題指佞草賦以生於堯堦有佞必指為韻

賦得良玉比君子詩七言排律十二韻得來字復  
見天心論

命大學士張廷玉尚書孫嘉淦閱卷

御定一等萬松齡一人授檢討二等朱荃等三人各授  
檢討庶吉士如元年例並詳題名卷中

謹按唐書選舉志云天子自召者曰制舉凡選未  
滿而試文三篇謂之宏詞中者即授官又按宋史  
云紹聖初置宏詞科歲許進士及第者請試如見

守官則受代乃請試章表露布檄書用駢儷體頌  
箴銘誡諭序記用古體或駢儷凡試二日四題取  
毋過五人大觀四年改置詞學兼茂科取毋過三  
人政和增為五人不試檄書增制誥以歷代史事  
借擬為之中格則授館職紹興三年改博學宏詞  
科凡十二題制誥詔表露布檄箴銘記贊頌序內  
雜出六題分三場每場一古一今拔其尤者定為  
三等上一等轉一官選人改秩無出身人賜進士

及第除館職中等減三年磨勘與堂除無出身人  
賜進士出身下等減二年磨勘無出身人賜同進  
士出身並許召試館職嘉熙三年臣僚請從舊三  
歲一試惟取合格不必拘額去宏博二字止稱詞  
學科我

朝作人之化曠古為昭陶淑百年再逢盛事備書典  
制用志

恩榮

考試

世祖順治十年二月

御試教習

國書翰林官於

內院擢通曉文義者三人胡兆龍以侍講陞侍讀學  
士李霽以編修陞中允莊同生以檢討陞贊善餘  
責令勉學者十二人調六部用者五人

是年三月

諭內院朕稽往制每科考選庶吉士入館讀書歷陞編檢講讀及學士等官不與外任所以諮求典故撰擬文章充是選者清華寵異過於常員然必品行端方文章卓越方為稱職乃者翰林官不下百員其中通經學古與未嘗學問者朕何由知今將親加考試先閱其文繼觀其品再考其存心持已之實據務求真學備朕異日顧問自吏禮兩部翰林侍郎及三院學士詹事府詹事以下各候朕旨親試分別高下以昭朕慎重詞臣之意四

月

上御太和門試兼翰林銜吏禮兩部侍郎及內三院學士  
編檢以上官六十二員君子懷德論一篇請立常  
平倉疏一通越日

駕幸內院將試過各官

御筆親定去留令留原衙門者照舊供職少詹事王崇簡  
以下二十一人俱從優外轉

諭吏部曰國家官人內外互用在內者習知紀綱法度則

內可外在外者諳練土俗民情則外亦可內內外外歷方見真才朕親試詞臣量為分別有照舊留任者有改授外任者其外任編檢以上官照詞臣外轉舊例優與司道等缺年衰病弱者聽其請告朕仍優遣之

十三年二月

御試教習

國書翰林官陳鼐永等十人均加賞賚外奪俸三月者四人閏五月再試



上以王熙等六人學問皆優有

旨獎勵餘住俸再留教習及鐫級外用各有差

聖祖康熙十八年五月

御試詞臣侍講牛鈕以名在第一即日除侍講學士

謹按牛鈕以庚戌成進士選庶吉士壬子散館授  
檢討未到任即除侍講先後皆殊擢也

二十四年正月

御試翰詹諸臣於

保和殿經史賦一篇

懋勤殿早春應制五言排律詩一首越二日

上親擢徐乾學等十一人再試於

乾清宮班馬異同辨一則

乾清宮讀書記一通扈從

祈穀壇七言律詩一首時修撰蔡升元納卷後

召對移時抵暮

命侍衛執燈伴送至閣門二月

上以試過翰詹諸臣徐乾學韓爌孫岳頌歸允肅喬萊學問優長文章古雅均加賞賚彭孫遹等照舊供職周之麟等分別調用各有差

三十三年閏五月

御試詞臣於西苑

欽命豐澤園賦理學有真偽論時贊善陸棻以名在第一即除內閣學士餘各賞賚有差

是年六月

御試詞臣於

暢春苑

欽命萬壽無疆賦擬

御製以題中五字為韻

擢詹事徐秉義第一

賜宴並

賜御筆擢秀清流四大字少詹事以下皆有賜惟不合格

者二十人不與

五十四年

御試詞臣於

乾清宮明四目達四聰論為有源頭活水來詩儲在  
文以名在第一

特命入直

南書房又

命直

武英殿八人致仕者二十四人

皇上乾隆二年五月

諭內閣翰林乃文學侍從之臣所以備制誥文章之選  
朕看近日翰詹等官其中詞采可觀者固不乏人而  
淺陋荒疎者恐亦不少非朕親加考試無以鼓勵其  
讀書嚮學之心自少詹講讀學士以下編修檢討以  
上滿漢各員著於本月初七日齊赴乾清宮候朕出  
題親試倘有稱病託詞者著另行具奏朕必加以處  
分考試之日著乾清門侍衛察看是月初七日

御試翰詹諸臣於

乾清宮先令掌院大學士等引

見於

養心殿奏名畢以次出就坐

欽命題為君難為臣不易論藏珠於淵賦以藏珠於淵

南華妙蘊為韻賦得薰風自南來詩七言排律十

二韻得來字既納卷

上親定其甲乙而加進退焉一等三人二等十人三等

二十人四等五十六人名在一等之陳大受以編修陞侍讀趙大鯨以贊善陞洗馬張映辰以編修陞侍讀名在二等之數文介福俱以檢討陞侍讀張若靄以編修陞侍讀吳應枚以侍讀陞侍讀學士世臣以侍講陞侍讀學士名在三等之鄂容安以編修陞侍讀鄒升恒以侍講陞侍講學士餘降調者七人休致者十三人十一日

賜優等翰詹諸臣



御製喜雪詩墨刻及宮紗文葛端溪松花石硯筆墨等  
物先是博學宏詞授職編檢劉綸等九人引

見時以

御試未久

特免與試至是並蒙

宣召一體

頒賜

八年四月

諭內閣古者創冊府於西崑闢芸臺於東壁是以木天  
儲彥石渠掄才由來尚矣乾隆二年朕曾親試翰詹  
諸臣因文以考其行所取者如陳大受等頗不媿此  
選也越今數載頗聞翰詹諸臣率從事於詩酒博奕  
而四庫五車鮮有能究心者將何以華館閣而垂來  
葉哉其依往例自少詹講讀學士以下編修檢討以  
上各員著於本月三十日赴圓明園候朕出題親試  
其托詞不至者列名具奏大學士等即承旨行是月

三十日

御試翰詹諸臣於

圓明園正大光明殿

欽命題禮以養人為本論藏珠於淵賦折檻旌直臣詩

五言排律八韻限三肴試畢

上親定一等三人二等九人三等十七人四等七十一

人名在一等之王會汾以編修陞侍讀學士李清

植以庶子陞少詹事袁曰修以編修陞侍讀學士

名在二等之觀保以編修陞侍講萬承蒼以編修  
陞侍講學士于振以中允陞左庶子沈德潛以編  
修陞左中允秦蕙田以編修陞侍講張若靄周長  
發陳兆崙周玉章於應陞處具名題奏餘降調者  
十九人罰俸一年者三十二人休致者二十人並  
賜優等翰詹諸臣宮紗文葛畫筵香囊筆墨等物閏四  
月

諭內閣昨考試翰林時由部屬等官用入翰林詹事衙

門者皆不與朕思伊等已陞用翰詹讀書作文乃其  
職分事既不似侍衛之足供差遣又不似部曹之日  
辦簿書若徒虛糜俸祿豈不貽素餐之譏且伊等雖  
不由庶吉士陞轉實俱科甲出身縱使不能詩賦如  
作論繙譯亦豈得謝曰不能著傳於初七日齊集圓  
明園候朕出題考試嗣後考試翰林時即將此等由  
別衙門改授者一併傳齊另題考試永著為例初七  
日

御試

欽命知人則哲論賦得數問夜如何詩五言排律六韻

得中字緒譯題

制曰天之立君以為民也君之設官分職亦以為民也  
人君必體上天生物之心人臣必體天子愛民之心  
蓋仁者善之長愛養百姓為居官之第一義所謂樂  
只君子民之父母者視之如子民之疾苦如己之痛  
癢相關當思損上益下則為益損下益上則為損以

至誠惻怛之心行惠澤寬大之政民有衣食為課農  
桑民有室家為謀幹止無事則未雨綢繆不足則多  
方補救人君有德意必實力奉行使膏澤及於民而  
無壅隔之患乃可以為民之父母若但以簿書錢穀  
為能以刑名督責為治不知愛養百姓則與為民設  
官之意相背馳而人君亦無以收承流宣化之益豈  
不謬歟越日

御定試過別衙門改用翰詹諸臣一等二人二等四人

三等四等各五人名在一等之侍讀學士石介令  
於應陞處具名題奏赫瞻以侍讀陞侍讀學士名  
在二等之世貴以侍讀陞庶子文保以庶子陞侍  
讀學士餘降調者五人初十日覆試翰林休致各  
員

欽命題長句之戰論螢光照字賦以尺璧非寶寸陰是  
競為韻賦得渭北春天樹五言排律詩八韻蒙

恩仍留原任者六人止令各罰俸一年



議叙

翰林充書局纂修書成例邀議叙預修

實錄尤為優渥總裁等有加宮傳銜

賜鞍馬者纂修以下或加級食俸或議予應陞或加級  
紀錄並宴賚有差其各館初開均月給廩餼書成  
議叙較核在館月日淺深以為差等

贈卹

世祖順治中修撰孫承恩卒

上深悼惜之

賜白金三百兩令其歸葬

聖祖康熙十五年十一月以故翰林院編修史鶴齡久侍

講幄素著勤勞

特賜祭一次

十七年十二月掌院學士陳廷敬丁母憂

上諭大學士等滿大臣有喪特遣大臣往賜茶酒滿漢大臣俱係一體著大學士明珠掌院學士喇沙里等攜茶

酒往賜尋部議以廷敬母用詹事封例無卹典

上念廷敬侍從舊勞用學士品級

賜卹

十八年十一月

上聞掌院學士喇沙里卒遣一等待衛對秦等齋銀三百  
兩往賜喇沙里之子三等侍衛俄爾濟圖為治喪  
之用仍傳

諭慰問其贈卹典禮俟禮部題給尋議上

特贈禮部尚書

賜諡文敏

謹按定制惟官至尚書大學士乃得予諡自是年  
學士喇沙里以講筵舊勞首得卹典後如掌院學  
士葉方藹

賜諡文敏詹事沈荃

賜諡文恪皆非常例也而沈荃之卒得

旨賜金五百兩以治其喪葬尤為優渥後編修何焯在籍

卒有司以聞

特贈侍講學士皆異數也

二十一年九月

上以翰林學士張英講筵供奉敬慎勤勞方告假回籍營

葬其父張秉彝

特命照張英現在學士品級

賜卹致祭

詞林典故卷四